



Cuira, ils 26 da mars 2024

Communicaziun a las medias

## Nov lavuratori «Scriver litterar»

La Lia Rumantscha porscha a partir dal 2025 in lavuratori «Scriver litterar» per auturas ed auturs rumantschs, l'emprima purschida da furmaziun e da perfecziunament per scriver texts litterars en rumantsch. Il curs cumpiglia tschintg moduls tematics litterars, dat ina survista da la litteratura rumantscha e sa concentrescha sin ils differents aspects dal mastergn da l'autura u l'autur. La purschida sa drizza a persunas rumantschas che han gia fatg emprimas experientschas da scriver texts litterars e che vulan approfondar quellas.

Per scriventas e scrivents rumantschs datti bainbaud ina purschida cumplessiva per emprender ed approfondar l'art da scriver texts litterars. Enfin ussa datti ina tala pussaivladad mo en las autras linguas nazionalas e betg en rumantsch. Ina realitad che la Lia Rumantscha vul midar cun porscher in tal curs a partir da l'onn 2025 er en rumantsch. Il lavuratori «Scriver litterar» è ina purschida da furmaziun e da perfecziunament per auturas ed auturs rumantschs. Ella pussibilitescha a las participantas ed als participants da chattar e precisar lur agen scriver litterar. La purschida sa drizza a persunas rumantschas che han gia fatg emprimas experientschas da scriver texts litterars e che vulan approfondar quellas. La furmaziun è er adattada per persunas che scrivon gia professionalmain en auters champs e vulessan svilupper vinavant lur abilitads. Persunas entusiasmadadas da la litteratura che vulessan scuvrir vias novas cun scriver èn era bainvegnidas – independentmain da la vegliadetgna, da la furmaziun e da l'idiom.

### Tschintg moduls tematics

Planisads èn tschintg moduls tematics che dattan ina survista da l'uschenumnà canon litterar rumantsch e sa concentreschan sin il mastergn dal scriver. Suentar avair frequentà questa part tematica approfondeschan las participantas ed ils participants cun sustegn da la gruppa e da menturas u menturs lur projects litterars individuals.

Ils moduls tematics vegnan manads da docentas e docents versads. L'emprim modul «Experiment» vegn concepì da l'autura ed artista Flurina Badel, il modul «Prosa» vegn manà da l'autur Leo Tuor, il modul «Scriver texts scenics» da la dramaturga Selina Beghetto ensemen cun l'autur e pedagog da teater Jürg Gautschi, la «Lirica» maina il poet Dumenic Andry ed il modul «Scriver e publitgar texts plurilings» l'autur e professor per didactica da plurilinguitad integrada a la scola auta da pedagogia dal Grischun, Vincenzo Todisco. Docentas e docents envidads vegnan a cumplettar il team. Il professor per litteratura e cultura rumantscha a l'Universitad da Turitg Rico Valär maina la part dal «Canon rumantsch».

Il lavuratori è vegnì concepì da Gianna Olinda Cadonau, responsabla per la promoziun da cultura da la Lia Rumantscha en collavuraziun cun l'autura Flurina Badel. Questa purschida da la Lia Rumantscha vegn sustegnida finanziailmain e concepziunailmain da la Fundaziun svizra per la cultura Pro Helvetia.



## Survista dals termins

A partir dal settember 2024 pon ins s'annunziar per il lavuratori da quatter semesters che cumenza il schaner 2025, cumpiglia bundant 30 sondas ed in tschert temp da lavur vi dals projects litterars individuals ils onns 2025 e 2026. Las vacanzas da scola vegnan resguardadas uschè bain sco pussaivel. Infurmaziuns davart la purschida èn da chattar sin [www.liarumantscha.ch](http://www.liarumantscha.ch). A partir dal settember 2024 vegnan ad esser publitgads l'andament ed ils criteris per l'admissiun al lavuratori ed ina descripziun detagliada dals cuntegns dals moduls.

Tgi che vul gia ussa savair dapli davart la purschida po sa drizzar a la Lia Rumantscha.

Dal reminent: Glindesdi, ils 6 da matg 2024 a las 19.00, ha lieu ina sairada litterara cun Gianna Olinda Cadonau e Flurina Badel en la Kulturgarage OKRO, Tittwiesenstrasse 21, a Cuira. Ellas preschantan en in dialog litterar la nova purschida da la Lia Rumantscha reflectond lur agen scriver litterar.